

BELIEVERS EASTERN CHURCH

World Church Headquarters, St Thomas Community
Thiruvalla – 689 103, Kerala India

Nirikgipaoni Chitti

January- February 2026

Pilak angni Kasara mesjakrangko nirikgiprang aro Rongtalgipa mondolio kimkim onge beberagiparang

Pagipa Degipa aro Gisik Rongtalgipani bimingo, Saksangipa Isoloni na-simang sakantina tomtomani pangnan ong-china. † Amen.

An-ching adita somoirangna skang mongsonggipa ming-gni Christianrangni manianiko pilak a-gimikni mondolirango maniangha, uara Christmas aro Theophany ong-a aro uan Jisu Kristoni Agilsako nama kattako gipatna gita a-bachengani ong-a. Uandake Christmas maniani Jisu Kristoni **mande pile** atchianiko maniani ong-a aro Theophany-ara Uni Jordon chibimao Napbolani ong-a, aro Isol an-tangan Jisu Kristo nama kattarangko aganprakna skang Sakgittamon Isol saksan ong-aniko parakaha.

Uandake, da-o an-ching dalgipa **Kalimani kariko** manina gita sienga.

An-ching sastro Jisu Kristoni nama kattarangko aganprakna skang salsotbrina okumu chakaniko nikna gita man-a, jen somoio diabol uko dakmajoachim.

Uandake an-ching Jisu kristokoni jakolko jarikgiparang ong-e, an-ching somoiko ra-e gisikni gita gital dakataniko man-na gita an-chingba Uni janggi tanganiko jarikgiparang ong-na nanga.

Ia mongsonggipa Kalimani kariko manianiara, an-ching an-tangtangko onate sontolao okumu chake bianichi an-tangtangni janggi tanganiko nipile Uni kema ka-anina Uo an-pilianian ong-a. Indake ia bilsini Kalimani Kariko manianiara February jani 15 tarikoni aba-chenge April 5 tariko matchotenga, je salon Easter maniani sal ong-skaa aro je salon an-chingni Gitel Jisu kristoni chakatpilani salba ong-skaa.

Indake ia manianirangko dakengon, na-simangni minggittam dakna nanggnirangko jekon an-chingni rongtalgipa mondoli ge-etanirangko on-aha, uko bimchipe katta ra.e dakchina gita anga didianiko on-na gita sikenga: uaranga okumu chakni, Isolo bi-ani, aro cholgrigiparangna jaksrame on-ani ba dakchakani

1. Okumuchakani

Jen somoio Jisu kristo okumu chakengachim, Uni be-enni gita okkriani namchina gita Uko ro.ongko pitta pil-ate cha.china gita diabol Jisuko majoaha. Indiba Jisu diabolna indine aganchake inaha, “mande pita arichi tangja, indiba Isolni kusikoni ong-katgipa pilak kattachi tanggen. Indake ia kattarangko Jisuan an-chingna mesokaha; mande janggi tanganio be.enni nanganirangna bate gisikni nanganirang dal.bata. An.ching an.chingko rakianichi, an’ching maiko cha.a aro badita an.ching cha.a – uandake an.chingni janggi tanganiko Isolona chapchap ong’e ra.bara. Uni jamano, Isol pilak an.chingni nanganirangko an.chingna on.skaa.

Oe, chongmotgipa okumu chakaniara be.enni cha.anirangna bate gamchatbata.

Jekai Sastroni kattarango aro mondoliko rikbadilgipapagiparang skiaha, an.chingko dingtang dingtang a.gilsaknirangchi ka-e donenggiparangoni naljokna gita katchongbatna nanga, jekai: ku.wattogijagipa

kattarangko aganani, mikdakani, mikbuani ba ong.enggipa chasonggitalanio ja.gitdotani, somoirangko ong-gijana jakkalstetani, an-tangtangko nokkol itatani, nangana badepile ku-bilbatko (mobile) jakkalani, be-enni kusina sikbatani, ia indakgipa ong-gramaigiparangchi sason ka.aniko man.aoni an.tangko naljokate, an-ching an-chingni ka-tongrangko Kristona kuturi tarina gita nanga jedakode Kristo Jisuo an-ching dal-rorogen aro an-ching Uo silrorogen.

2. Isolo Bi-ani

Isolo bi-ani gri okumu chakniara gisikni gita janggi tanganio gamchatani dongja ine an-ching nikna gita man-a, uni giminsa an-chingni rongtalgipa mondolio attamantio maikai ia karirango Isol bi-jringe janggi tangna gita nanga tik dake donaha; uni gimin pilak bebera-gipa sakantiko pangnan ku-cholsan Isolni kema ka-anina aro ka-sachakanina Isolo bi-china gita didianikoba on-a.

An-chingni mondoli bi-anio mangrakaniko man-na gita bian buduko on-aha aro uko bi-on Jisuni bi-aniko bi-bo. – “Gitel Jisu, Isol Depante, anga saksa papina ka-sachakbo” – uandake salantio bi-aniko nang-ni janggi tanganio ranta ka-na gita na-a bi-an buduko jakkalbo; maikai mondoliko rikbadilchenggipa rongtalgipa pagiparang dondikgija bi-angaha. (Kolosirangna 4:2; Thessalonikarangna 5:7)

Indake an-ching bi-an buduoni rongantiko rim-rikrike Jisun bi-aniko bi-jringon, ua bi-anirang an-chingni ka-tongo ja-dil su-ataniko on-a aro uan dake salantio janggi tanganichin Isolni ka-tongona chapchap ong-ata.

3. Jaksrame on-ani

Dakchakaniko nangenggipa kangal manderangna jaksrame dakchakanian Isolni dedrangni dakna nanggnigipa daitorangko chusoksrange dakani ong-a. Sakgipinna dakchakani aro ka-sachakani gri okumu chakanira an-chingni dakna nangkuengipako chusokkugijanian ong-a. Isaia katchinikgipa skia, okrigiparangna nang-ni cha-aniko on-parara, apal galgimin kangalko nang-ni nokona imbara ong-jama (Isaia 58:7)

An-chingni kalimani kariko maniara an-ching an-tangtangni janggi tanganiko nipile gital daktaina gita on-kangani aro ia chasongo ong-enggipa abostarango namatpilaniona jakko on-anian mongsonggipa orto ong-a. Gitel Jisu an-chingko gisik ra-ataniko on-a, “ na-a jejerangko uamangna dakaha, uan angna daka” (Mati 24:40).

Indake an-ching ia karirango maiko dake janggi tangna nanga adita mesokanirang gnan:

1. Gilja ka-a changantion na-a saksa nokdangni mande gita bakko ra-bo

An-ching ia dal-gipa kalimani kariko maniengon, an-ching mondoli baksa chapchap dake Jisuko jarikna gita nanga. Jen somoio an-ching paltang ong-e okumu chake bi-anirangko daka, nokdangrang aro gittimo apan donggiparang baksa dakna gita nanga. Uni gimin bebera-giparang baksa kucholsan ong-e attamni giljao bakko ra-jringanian nangchongmotgipa ong-a.

2. Nangrimpil-aniona re-bapil-ani

Jisu agana, Aro na-simangni chadenge bi-an salo sakoba matnangani nang-o gnanode, uko watbo; maikai salgio donggipa na-simangni Paaba na-simangni namgijarangko watna man-gen” (mark 11:25). Ka-tongo ka-a gapanichi aro sakgipinko kema ka-na man-gijanichi olakianio Isolko kusi ong-atna gita man-ja. Uni giminsa, mondolirang nangrimpilaniko dakna gita kalamni kario manianiko mania. Uni gimin an-ching iako maniengon sakantion giljachi re-e olakianio bakko ra-chongmotna gita nanga. Uandake an-ching saksa sakgipinko kema ka-na gita nanga aro saobana na-a ong-gijako ba gisik saaniko dakmanaha ong-ode kema bina nanga, an-tangtangko bamatbo, nangrimgijaniko nangrimataniko dakbo aro kristoni be-eno gisiksan ong-e janggi tang-bo.

3. Pap ku-rachake gisik pilangni

Gisik Rongtalgipa an-chingni banga paprangko mesoke on-gen- jekai an-chigni chusokgijanirang aro ka-ting da-anirangko, uan dake an-ching ia karirango skie ra-an baksa Isolona chapchap ong-e jangi tangna gita man-gen. Na-a uarangko mamung dakeba dununa jotton ka-nabe. Papko ku-chake sontolao gisik pil-bo aro Isolni ka-sachakanina Uo bi-bo. Indake ong-engon na-a dakmajoaniko man-kuengoba, na-a nang-ni ka-tongko bilgriatnabe. Na-a nang-ni gisiko dakgrikanirangko dunuani grian nang-ni kamalna aganbo aro gisik pil-bo aro maina rongtalao gisik pil-aniara nang-ni paprangko Isolni kimmitaniko man-e janggi tanganiko tangchapil-aniko man-a.

Na-a ia Kalimani karirangko manianichi gisikni gita be-enni pilak kusirangko janggilate songrengon, nang-na gisikni gita dakchakgipa an-chingni rongtalgipa mondolio gnan, jekai: salantio sastro poraiani, kalimani karirango chanchibewalani aro salantio bi-na gita tarigimin Liturgy, nang-ni paltang bi-ani aro nokdang baksa apsan bi-ani. Uni gimin ia karirango jakkalna gita dakgimin ki-taprangko name ja-rikbo je dakode ia dalgipa kalimani karirangko maniao orto gnanggipa ong-e na-a aro nang-ni mondoli Isolni patianiko man-gen.

Angni gisikni dedrang, angni na-simang sakantina bi-ani ian, ia dingtangmancha okumu chake kalimani karirangko maniani Isolni ka-sachakani aro bilakatani ong-china aro Ua Uni gisikko na-simangna watate Uni namnikaniko dakna na-simangna dakchina, Uni ge-etanirangko manina gita bilakatchina aro Uni ka-sachakani na-simangni kosako baririchina. Jedake anga na-simangni gisikni pagipa ong-a, angaba apsan ia rongtalgipa karirango na-simang baksan bakko ra-e songrenga. Uni gimin hai an-ching dondikgija Gitelni patianina bi-na.

Isolsanon Isol Gittamgipa, Pagipa Degipa aro Gisik Rongtalgipani Uni dondikgija ka-saanio aro ka-sachakanio aro pilak Rongtalgiparangni bi-ani aro Theotokos, Isolni Singhason mikkango an-chingko da-o aro pangnan jolnan chel-chakchina, † Amen

Pagipan ka-san baksa bi-ani

Moran Mor Samuel Theophilus Metropolitan

Date: 21 Janury 2026

Place: World Church Headqqrter